

Con Aruba por enfrenta y probecha di enbehecimento di poblacion

ENBEHECIMENTO di poblacion ta wordo mira rond mundo como un reto, pero Aruba por uza e cambio demografico aki como un oportunidad. Door di mantene hende grandi activo den economia pa mas tempo, inverti den habilidadnan digital y duna nan un rol den turismo y preservacion di cultura, Aruba por stimula e economia 'gris' y reduci e presion riba e forsa laboral mas hoben. Aki tin cinco strategia cu Aruba por aplica pa enfrenta enbehecimento efectivamente.

1. Mantene hende grandi na trabou pa mas tempo

Hopi hende grandi kier y por traha pa mas tempo, contal cu nan haya e apoyo corecto. Aruba por encurasha companianan pa mantene of bolbe contrata trahadonan di experiencia di edad avansa.

Esaki por wordo haci door di:

- Beneficianan fiscal pa companianan cu ta mantene trahadonan di 60+ aña.
- Modelonan di trabou flexibel, manera trabou part-time y funcionnan di conseho.
- Programanan di mentor, unda trahadonan di experiencia ta guia coleganan mas hoben.

Door di mantene hende grandi activo den e mercado laboral, nan conocimiento y experiencia ta keda conserva y e presion economico riba generacionnan mas hoben ta wordo reduci.

2. Mas oportunidad pa trabou flexibel y remoto

No ta tur hende grandi kier traha full-time, pero hopi kier keda parcialmente activo. Aruba por desaroya iniciativanan pa trabou for di cas, tarea 'freelance' y trabounan part-time especificamente pa hende grandi. Companianan por uza hermentnan digital pa laga hende grandi traha di un distancia den funcionnan administrativo, educativo of di conseho.

Door di ofrece trabou segun nan capacidad, hende grandi por keda economicamente independiente pa mas tempo, loke ta baha e presion riba pensioen y beneficianan social.

3. Adapta e sector di 'retail' na hende grandi

Hende grandi tin un poder di compra fuerte y ta gasta nan placa diferente cu generacionnan mas hoben.

E sector di 'retail' na Aruba por 'tap in' den e 'silver spending power' aki door di:

- Desaroya mas tienda y servicio 'senior-friendly', manera productonan ergonomico y experiencianan di compra adapta.
- Ofertanan turistico dirigi riba hende grandi, manera biahenan di 'wellness' y estadia a largo plaso.
- Descuentonan special y programanan di lealtad pa personanan di 60+ aña.

Door di adapta e economia n'e demografia cambiante, Aruba por sigui beneficia di e gastonan di consumidornan di edad avansa.

4. Haci hende grandi 'digitalmente capabel'

Un di e retonan mas grandi pa hende grandi t'e digitalisacion rapido di sociedad.

Aruba por inverti den training y 'workshops' pa mehora habilidadnan digital cerca hende grandi, manera:

- 'Online banking' y uzo di internet sigur.
- Comunicacion digital (manera email, WhatsApp y 'videocalls').
- 'E-commerce' y oportunidadnan di trabou online.

Door di haci hende grandi digitalmente mas fuerte, nan ta keda conecta economicamente y socialmente, loke ta mehora nan bienestar y ta baha nan dependencia di cuido.

5. Uza hende grandi pa cultura y turismo

Aruba tin un historia y tradicionnan rico cu mester wordo preserva. *Hende grandi por hunga un rol clave den esaki, door di:*

- Guia 'tours' cultural y proyectonan di herencia.
- Duna 'workshops' riba artesanía tradicional y arte local.
- Como embahador di Aruba, laga turistanan conoce e historia y cultura di e isla.

Door di envolve hende grandi activamente den turismo y cultura, Aruba ta keda atractivo pa bishitante y generacionnan di edad avansa ta wordo balora pa nan contribucion na sociedad.

Aruba no por stop enbehecimento, pero e por uz'e como un oportunidad economico. Door di stimula empleo pa hende grandi, mehora habilidadnan digital y adapta e economia na nan necesidadnan, Aruba por crea un sociedad financieramente sostenibel y social den cual tur generacion ta sigui contribui. E clave ta sinta den un maneho cu ta mira hende grandi como un recurso valioso, no como un peso.

SUNSET GRILLE
Where Classic Delights Serve Modern Twists

20% off for locals*

*Offer is valid for local residents with a local ID. Limited to a maximum of 12 persons. Bottles are not included in this offer.

Open Daily 5:30 pm - 10:30 pm
J.E. Irausquin Blvd. 81, Palm Beach | hiltonaruba.com | @hiltonaruba
+297-526 6612 | AUAHH_SunsetGrille@hilton.com